



## **KOMUNIKADO PA PRENSA**

*Fecha*  
20 yüli 2016

*Accountmanager di Komunikashon*  
Jhanirha Da Costa Gomez

*Email*  
[jhanirha.anita@gobiernu.cw](mailto:jhanirha.anita@gobiernu.cw)

### **Diálogo ku mas di 200 habitante di Boca Simon, huntu ku Minister Camelia- Römer i Domeinbeheer: Un éksito!**

**Willemstad** – Durante di un diálogo eksitoso entre mas ku 200 habitante di área Boca Simon huntu ku Minister Suzy Camelia-Römer i Domeinbeheer a duna oido na deseo di kurason di e pueblo. Esaki tabata den kuadro di desaroyo di e kosta den área aki. Pa basta tempu tin diferente akshon tumando lugá kontra di e área di rekreashon na parti di e kosta patras di Penstraat, na altura di skol Martin Luther King. Esaki a hiba ku aktualmente e fasilitatnan eksistente ta deb un mal estado.

Minister Camelia-Römer a vosiverá su maneho di mantenshon i òrdu kantando e kansion *"Kita man kita man fo'i nos tera, hala leu hala leu fo'i nos awa"*. Ku esaki el a enfatisá ku awa di laman ta hunga un ròl hopi importante den nos kada un su bida komo habitantenan di un isla. Pues no por priva niun hende di tin aksesu liber na nos kosta i playanan.

Minister a enfatisá tambe ku promé ku tuma akshon mester tene kuenta ku derechinan legal i seguridat di e pueblo. Seguridat ta sumamente importante. Ke men no ta tuma akshon ni kita kosnan eksistente pa loko. Riba invitashon di Minister Camelia-Römer, Minister Larmonie-Cecilia tambe tabat'ei presente i a suministrá informashon i skucha preokupashon di habitantenan.

Domeinbeheer den kolaborashon ku e kompania MIC N.V. a diseñá un plan di desaroyo ku lo tuma 5 luna pa ehekutá. A presentá e plan aki durante di e diálogo na habitantenan i a skucha kiko nan ta opiná i deseá pa kambia. E plan ta konsistí di entre otro: un área kaminda por kumpra algu di kome i bebe; un sitio kaminda muchanan i adultonan por praktiká arte; un koredor ku ta forma e base prinsipal di e infrastruktura di e plan di desaroyo; un espasio pa por hasi komèrsio; un tualèt públiko; un 'outdoor gym', i hopi mas. Den tur esakinan a tene kuenta ku aspektonan di vegetashon i naturalesa.

Habitantenan a duna di konosé ku ta sumamente importante pa tin un sitio kaminda hóbennan por praktiká arte i desaroyá kontinuamente nan abilitatnan artístiko. Tambe a trese dilanti e echo ku tin nesidat pa mas iluminashon i seguridat den e área. Algu ku ámbos partido tabata di akuerdo kuné tabata e desaroyo di e koredor na kosta. Esaki ta parti di e plan aktual, i sigur lo yuda pa tin mas moveshon i asina mas seguridat den e área.

Lo duna espasio na habitantenan mes pa indiká ken ta personanan responsabel ku lo por yuda manehá e área. Di e forma aki ta garantisá ehekushon di e plan di desaroyo aki i mantené òrdu.